

Morning Dogri (NSD) Bulletin

12-March-2026

आकाशवाणी

खबरां विजय बजाज कोला

खास-खास खबरां:-

1. घरेलू स्तर पर एल.पी.जी दी सप्लाई गी बढ़ावा देने लेई कीते गेदे सरकारी हीलें दे चलदे भारत दा एल.पी.जी उत्पादन 25 फीसद बधी गोआ ऐ।
2. भारत नै आपूर्ति च मजूदा रुकावटें दे दरम्यान- एमरजेंसी तेल भंडार जारी करने दे अंतराष्ट्री ऊर्जा एजेंसी दे फैसले दा सुआगत कीता ऐ।
3. कतर च भारत दे राजदूती दफतरै- अज्ज भारत लेई कतर एयरवेज दियां दंऊ डुआरियां भेजने दा ऐलान कीता ऐ।
4. संयुक्त राष्ट्र सुरक्षा परिशद नै इक प्रस्तास पास करिये ईरान गी खाड़ी देशों पर हमले गी तुरत रोकने दी मंग कीती ऐ ते आखेआ ऐ जे एह हमले अंतराष्ट्रीय कूननें दी गंभीर उल्लंघना करदे न।
5. FIH हॉकी महिला विश्व कप क्वालीफायर च भारती टीमै कल संजा हैदराबाद च पूल-बी दे मुकाबले च वेल्स गी 4-1 कन्ने हराई दिता।
6. भारती क्रिकेट कंट्रोल बोर्ड -बी.सी.सी.आई नै Indian Premier League –IPL दे पैहले चरण दा कार्यक्रम घोषत करी दिता ऐ एह चरण 28 मार्च थमां 12 अप्रैल तगर होग।

<><><><><><>

West Asia

भारत च रसोई गैस यानि एल.पी.जी. दे घरेलू उत्पादन च लगभग 25 फीसद दा बाददा होआ ऐ। एह बाददा सरकार आसेया घरेलू उपभोक्ताएं आस्तै आपूर्ति बदाने लेई पुट्टी गेदी गेंस दे मगरा होआ ऐ। नमीं दिल्ली च कल संजा पच्छिम एशिया दी मौजूदा स्थिति पर आयोजित अंतर मंत्रालय ब्रीफिंग च संयुक्त सचिव सुजाता शर्मा होंरे दस्सेया जे 8 मार्च 2026 गी सरकार नै इक आदेश जारी कीता हा। इस आदेश च रिफाइनरियें ते पेट्रोकेमिकल परिसरें गी प्रोपेन- ब्यूटेन- प्रोपिलीन- ब्यूटीन्स जनेह गैस कन्ने एल.पी.जी उत्पादन बदाने दे निर्देश दिते गे हे।



IEA Oil

भारत नै आपूर्ति च मौजूदा रुकावटें दे चलदे अंतराष्ट्रीय ऊर्जा एजेंसी दे आपातकालीन तेल भंडार जारी करने आहले फैसले दा सोआगत कीता ऐ। पेट्रोलियम ते कुदरती गैसैं सरबंधी मंत्रालय नै इक ब्यानै च आखेआ जे भारत अंतराष्ट्रीय ऊर्जा एजेंसी दा सहयोगी सदस्य ऐ ते अंतराष्ट्रीय ऊर्जा सहयोग च सक्रिय हिस्सेदार बी ऐ- मंत्रालय नै एह बी आखेआ जे भारत वैश्विक ऊर्जा बजारें च बदलदी स्थिति खास करी मध्य पूर्व च होआ' रदे घटनाक्रम पर लगातार नजर रखा'रदा ऐ।



Indian Nationals

भारत नै पच्छिम एशिया च अपने बसनीकें लेई सहायता बदाई दिती ऐ। लेबनान ते कतर थमां सैकड़ें बद्दे भारतीयें गी कारोबारी डुआरियें दे राहें भारत आहन्नेआ गेआ ऐ। बेरुत च स्थित भारत दे राजदूती दफतरै मुजब- 177 भारतीयें दा पैहला जत्था कल चार्टर डुआरी दे राहें नमीं दिल्ली वापस आहन्नेआ गेआ। तौंआई कतर च स्थित भारत दे राजदूती दफतरै मुजब- उत्थे फसे दे 500 शा मते भारती कल कतर एयरवेज़ दियें डुआरियें राहें भारत पुज्जे। राजदूती दफतरें मूजब- कतर एयरवेज़ अज्ज भारत लेई दंऊ बाद्दू डुआरियां चलाने आला ऐ। इक नमीं दिल्ली ते दुई मुम्बई लेई- मजूदा हालात दे चलदे दूतावास नै भारती नागरिकें लेई पासपोर्ट जारी करने दी प्रक्रिया गी तेज करी दिते दा ऐ।



West Asia Conflict

पच्छिम एशिया च तनोतनी तेजी कन्नै बधा करदा ऐ। ईरान नै फारस दे खाड़ी च कारोबारी जहाजें गी निशाना बनाया ऐ ते संयुक्त अरब अमीरात च विमानन ढांचे पर हमले दी कोशश कीती ऐ। अबूधाबी प्रशासन दे मूजब- पराने अबूधाबी ब्हाई अड्डे दे नेडे अग्ग लग्गी गई ही- जिस पर तुरत काबू पाई लैता गया। एहदे शा पैहले 11 मार्च गी दुबई अंतराष्ट्रीय ब्हाई अड्डे पर ड्रोन हमले च इक भारती नागरिक सनें 4 लोक जख्मी होई गे हे।



UNSC Resolution –Iran

संयुक्त राष्ट्र सुरक्षा परिषद नै इक प्रस्तास पास करियै ईरान गी खाड़ी देशें पर हमलें गी तुरत रोकने दी मंग कीती ऐ। परिषद दा आखना ऐ जे एह हमले अंतराष्ट्रीय कनून दी उल्लंघना करदे न ते अंतराष्ट्री शांति ते सुरक्षा लेई गंभीर खतरा न। एह प्रस्तास 13 वोटें दे समर्थन कन्ने पास होआ-जिसले के 2 मुल्खें- मतदान थमां दूरी बनाई रक्खी। कुसै बी देश नै एहदे खलाफ मतदान नैई कीता-उत्थै गै रूस ते चीन नै इस प्रस्तास दी निंदेया करदे होई आखेआ ऐ जे एहदे च ईरान पर होए दे अमरीकी-ईजरायली हमलें दा जिक्र नैई कीता गेआ ऐ। तांआई ईरान दे रिवोल्यूशनरी गार्ड नै दुनिया लेई बड़े मते महत्वै आले समुन्द्री रस्ते-होरमुज जल डमरू मध्य पर नियंत्रण करी लैता ऐ- जित्थुआं दुनिया दे तकरीबन 20 फीसद तेल ते गैस दी आपूर्ति लंगबदी ऐ। इस जंग दे कारण कच्चे तेल ते एल.पी.जी. दियां कीमतां बधी गेइयां न- जेहदे करी दुनिया भरै च उपभोक्ताएं ते कारोबार पर माड़ा असर पेआ ऐ।



RDD Discussion

राजसभा च अज्ज ग्रामीण विकास मंत्रालय दे कम्मकाज पर चर्चा अगगे बधाई जाहगा। उत्थै गै लोकसभा च वित्त मंत्री निर्मला सीतारमण- माली बरे 2025-26 दियें सेवाएं लेई भारत दी संचित निधि थमां किश बाद्दा रकम दे भुगतान ते विनियोग गी अधिकृत करने लेई विनियोग विधेयक-2026 पेश करडन। कल लोकसभा च अध्यक्ष ओम बिरला हुंदे खलाफ अविश्वास प्रस्तास ध्वनिमत कन्ने खारिज करी दिता गेआ। सदन च चर्चा दा परता दिंदे होई गृहमंत्री अमित शाह होरें आखेआ जे एह बड़ा गै मंदे भागें आला ऐ जे बरोधी धड़े नै लोकसभा अध्यक्ष हुंदी निश्ठा पर सोआल पुट्टेआ ऐ। उ'नें आखेआ जे तकरीबन 4 दहाकें दे बाद लोकसभा अध्यक्ष दे खलाफ अविश्वास प्रस्तास आहन्नेआ गेआ- जेहड़ा संसदी राजनीति ते सदन- दौनें लेई गै इक माड़ी घटना ऐ। उ'नें आखेआ जे सदन कुसै इक पार्टी दे नैई सगुआं पूरे सदन दे होंदे न।



FIH Hockey

FIH हॉकी महिला विश्व कप क्वालीफायर 2026 च भारतीय टीम नै कल शानदार प्रदर्शन करदे होई वेल्स गी 4-1 कन्नै हराया- एह मैच हैदराबाद च होआ। मैच च नवनित कौर नै शानदार प्रदर्शन करदे होई त्रै गोल दागे- उत्थै गै साक्षी राणा नै बी इक गोल कीता। इस जित कन्नै भारत नै सैमीफाईनल च अपनी थाहर बनाई लेती ऐ। हुन कल सैमीफाईनल च भारत दा मुकाबला इटली कन्नै होग।

<><><><><><>

BCCI-IPL

भारती क्रिकेट कंट्रोल बोर्ड- बी.सी.सी.आई नै Indian Premier League –IPL 2026 दे पैहले चरण दा कार्यक्रम घोषत करी दिता ऐ। एह चरण 28 मार्च थमां 12 अप्रैल तगर होग। इस दरान 3 राज्ये च विधानसभा चुनांस होने न-इस करिये चुनांस दियां तरीकां घोषत होने दे बाद गै पूरी प्रतियोगिता दा कार्यक्रम जारी कीता जाहग। बेंगलुरु दे एम. चिन्नास्वामी स्टेडियम च Royal Challengers Bangalor ते Sunrises Hyberabad दे बशकार मैच दे कन्नै इस प्रतियोगिता दी शुरुआत होग। उदघाटन मुकाबले दे अगले दिन मुम्बई Indians दा सामना कोलकाता नाईट राईडर्स कन्नै मुम्बई दे वानखेड़े स्टेडियम च होग। प्रतियोगिता दे पैहले चरण च 10 थाहेरं-बेंगलुरु- मुम्बई- गुवाहाटी- चंडीगढ़- लखनऊ- कोलकाता- चेन्नेई- दिल्ली- अहमदाबाद ते हैदराबाद च कुल 20 मैच खेड्ढे जागंन। हालांकि बेंगलुरु च प्रस्तावित मैच कर्नाटक सरकार आसेया खडेरी गेदी माहिरें दी कमेटी दी मंजूरी दे तैहत होगंन।

<><><><><><>

Read by : **Vijay Bajaj**
Stand by : **Shruti Khajuria**
D.E.O. : **Rajni Devi**
Skilled : **Rajat Paul**
Editor : **Kunal Shrivatsa**